

河東道

河北道

卷五十一蔚

州興唐

靈邱

飛狐

朔

州鄆陽

馬邑

卷五十二孟

州河陽

温縣

沁水

河陰

卷五十三懷

州河內

武德

修武

武陟

卷五十四魏

州大名

元城 南樂 魏縣 館陶 冠氏 葦縣

永濟 宗城 經城 清平

聊城 堂邑

博平

博

州聊城

堂邑

高唐

博平

卷五十五相

州安陽

鄆縣

湯陰

永定

卷五十六衛

州汲縣

新鄉

衛縣

共城

磁

州滏陽

武安

邯鄲

昭義



太平寰宇記卷之五十一

河東道十二

蔚州

朔州

蔚州

蔚州

安邊郡今理興唐縣

禹貢冀州之域虞及周屬并州周禮

并州川曰嘔夷浸曰涑易今嘔夷在靈邱涑易在

飛狐皆在州境春秋時其地屬晉戰國時屬趙趙

襄子殺代王有其地其後武靈王置雲中雁門代

郡秦亦為代郡漢高帝元年項羽徙趙王歇為代

王二年陳餘迎歇還趙歇又立餘為代王三年韓

北京圖書館藏



信斬餘置代郡領縣一十八東魏孝靜帝又于此  
置北靈邱郡周宣帝于今理置蔚州隋大業三年  
罷州置雁門郡之靈邱縣唐武德四年平劉武周  
六年置蔚州寄治并州陽曲縣仍置靈邱飛狐二  
縣七年寄治代州繁峙縣八年寄治忻州秀容之  
北恆州城貞觀五年移于今理天寶元年改爲安  
邊郡至德二年九月改爲興唐郡乾元元年置蔚  
州

領縣三

興唐 靈邱 飛狐

州境

東西 缺

南北 缺

四至八到

南至東京 缺

南至西京一千六百三十里

南至長安二千里

東至易州山路三百二十里

南至鎮州取秦嶺路四百九十里

西至朔州三百八十里

東南至定州取轆轤路四百九十里



西南至代州四百里

西北至朔州四百六十里

東北至媯州界孔嶺關一百里從關至媯州又一百五十里

戶

唐開元戶四千八百八十一

風俗同代州

人物

馮唐代人也以老為郎

土產

熊皮 豹尾 雕翎 金 銀 大韭後魏孝文帝以土地

沃壤慮軍食闕山野多種大韭肥地皆長三尺葉廣如馬蘭但味少甘食之禦饑今圖經所謂大韭

多生于山野及平川是也 賦麻 布 花斑石

興唐縣郭本漢靈邱縣地唐開元十二年于州東北

一百四十里橫野軍子城南置安邊縣屬蔚州天

寶元年改為安邊郡仍改安邊縣為興唐縣梁開

平二年改為隆化縣後唐同光初復舊晉初改為

靈仙縣漢初復舊 倒刺山在縣東七十里又號

雪山俗傳靈仙所居與五臺山略同 嘔夷河亦

曰瓠瓠河上槽狹下流闊形有似瓠瓠因名 橫



野軍置在州城內

靈邱縣

西南一百三十里今五鄉

本漢舊縣屬代郡後漢省東魏

靜帝重置屬靈邱郡隋開皇三年罷郡縣屬蔚州

大業二年省改隸代州隋末陷於賊唐武德六年

又置屬蔚州 高是山在縣西北七十里山海經

云高是之山滋水出焉土地記云鹵城東三十八

里有枚迴嶺北與高是山連麓接勢通爲高是山

太白山在縣南十里山有鍾乳穴其深不測仰

望穴中乳如懸穗滴瀝穴中有小水名石井 石

銘陁嶺在縣西北八十里上有石銘題言冀州北

界故謂之石銘陁 隘門山亦曰隘口今呼爲龍

門在縣東南十五里壁立直上層崖刺天有古道

極險隘後魏明元帝于此置義倉之所 嘔夷水

一名澆水出縣西北高是山周禮曰并州其川嘔

夷謂此也 滋水出縣西南枚迴山懸河五丈湍

激之聲響動山谷樵伐之士咸由此渡巨木淪滑

久乃方出或落崖石無不粉碎也 邠夷水經邑

界 射臺在縣南一十八里水經注云靈邱縣有

御射臺臺南有御射碑卽後魏文成和平二年南

巡于此路左有山高七百仞命羣臣射之不過半



帝乃射之箭過其頂三十餘仞落山南三百步遂刻石焉其碑現存陰刊從臣姓名 真谷關在縣北七十里 開皇長城西自繁時縣經縣北七十里東入飛狐縣界 趙武靈王墓在縣東三十里 飛狐縣東南一百里一十二鄉 本漢廣昌縣地屬代郡後漢屬中山國魏封樂進爲廣昌侯卽謂此後廢晉又屬代郡周大象二年于五龍城復置廣昌縣卽此邑也隋開皇三年改屬蔚州仁壽元年改廣昌縣爲飛狐縣因縣北飛狐口爲名隋末陷賊唐武德六年重置寄理今易州遂城縣界遙屬蔚州貞觀五

年移還今所一倒刺山在縣東北百二十里出椒大黃 涑水亦名巨馬河今名涑水源也 磨笄山一名靡笄山在縣東一百五十里史記趙襄子姊爲代王夫人襄子旣殺代王迎其姊夫人曰以弟慢夫非仁也以夫怨弟非義也磨笄自刎百姓憫之爲立祠于山上今與媯川郡山相連又隋圖經云趙襄子登之以觀代國一號看山按代地本北狄姜姓之國周末強大在七國前稱王以今雲中馬邑五原安邊定襄皆爲代國之北地焉 長城按邢子勵記云飛狐界古長城也 交牙城水



經注云廣昌縣南有交牙城未詳所築以地有交  
牙川爲名 板殿城水經注云廣昌縣南有古板  
殿城 代城十三州志云古代城在飛狐界按盧  
植說異云初置郡時方就板幹夜忽自移西南五  
十里大澤中板幹自設結葦爲九門于是就以爲  
城 三河冶舊置鑪鑄錢唐至德以後廢元和七  
年宰臣李吉甫奏訪聞飛狐縣三河冶銅山約數  
十里銅鑛至多去飛狐錢坊二十五里兩處同用  
拒馬河水以水鞣銷銅北方諸處鑄錢人工絕省  
所以平日三河冶置四十鑪鑄錢舊跡猶存事堪

覆實今但得錢本令本道應接人夫仍舊鼓鑄則  
不三年以來其事卽立救河東困竭之弊成易定  
援接之形制置一成久長獲利詔從之其年六月  
起工至十月置五鑪鑄錢每歲一萬八千貫時朝  
廷新收易定河東久用鐵錢人不堪弊至是俱受  
利焉 飛狐道自縣北入媯州懷戎縣界卽古飛  
狐口也漢書酈食其說漢王曰杜白馬之津塞飛  
狐之口此皆言一方之阨也又晉中興書曰建興  
中劉琨自代出飛狐口奔于安次是此道也 香  
山上有古寺在縣城中



朔州

朔州

馬邑郡今理鄯陽縣

禹貢冀州之域春秋爲北狄之地秦

爲雁門郡在漢卽雁門郡之馬邑縣也史記漢高帝以韓王信居太原郡爲韓國以備胡信以晉陽去塞遠請理馬邑上許之後爲匈奴圍信數求救上賜書責信信懼以馬邑降胡與胡同居參合漢將軍柴武後屠參合以殺信參合卽代郡縣也漢末大亂匈奴侵邊自定襄已西雲中雁門之閒遂空建安末曹操北征集荒郡之人又立馬邑縣屬新興郡至晉改屬雁門郡晉亂其地爲猗盧所據

晉懷帝時劉琨表以鮮卑猗盧爲大單于封代公徙馬邑縣卽其地也後魏都代地卽今郡屬畿內至孝文遷洛之後又于今州北三百八十里定襄故城置朔州領盛樂廣牧二郡葛榮之亂州郡又廢高齊天保六年又于今州西南四十七里新城置朔州八年仍移于馬邑城卽今城也武成帝置北道行臺周武帝置朔州總管隋開皇罷總管府大業三年罷州爲馬邑郡唐武德四年置朔州領鄯陽常寧二縣其年省常寧縣天寶元年改爲馬邑郡乾元元年復爲朔州



領縣二

鄯陽 馬邑

州境

東西四百八十里 南北九十七里

四至八到

南至東京

缺

南至西京一千三百五十里

西南至長安一千七百二十里

東至蔚州四百六十里

南至代州界一百四十六里

西至嵐州三百七十四里

北至單于大都護府三百五十七里

東南至代州界一百二十里

西北至單于府一百二十里

東北至故雲州二百六十里

戶

唐開元戶六百三十

風俗

同代州

人物

張遼

字文遠馬邑人為魏征東將軍

賀拔勝

字破胡神武人為僕射

尉



遲恭

字敬德馬邑人封鄂國公

安重榮

土產

雕翎

肉菘蓉

豹尾

貢

甘草

鄯陽縣

八本漢馬邑縣屬雁門郡漢末荒廢建安中

又置屬新興郡晉又屬雁門郡晉末又廢高齊于此置招遠縣屬郡不改隋開皇三年罷郡改隸朔

州大業元年改為鄯陽縣 白登山在紇真山北

十里 武周山冀州圖云武周山在郡西北東西

數百里南北五十里山之南面千仞壁立 紇真

山冀州圖云在城東北三十里登之望桑乾代郡

數百里內宛然夏恆積雪故彼人語曰紇真山頭

凍死雀何不飛去生處樂又有神泉人歌曰紇真

山頭有神井入地千尺絕骨冷 元姬山後魏書

云道武侍人姓李善謳謔死葬此山魏主思之樂

府為之曲其曲存焉 紫塞河源出州界馬邑地

一名金河南流合桑乾河在縣東十里 白樓郡

國志云即後魏納姚女為后悲思故國造此樓登

望飾以鉛粉故名之 馬邑城即今州城也搜神

記云昔秦人築城于武周塞內以備胡城將成而

崩者數矣忽有馬馳走周旋反覆父老異之因依



走迹以築城城乃不崩遂名馬邑 陰館城今名  
下館城地理志云陰館縣屬鴈門郡 太平城後  
魏穆帝所理此城冀州圖云太平城城上埤垣卻  
敵在內郭城東西南北各十里內有統萬所送大  
釜二口各受二百石 新城一名平城卽猗盧所  
都 安邊縣城唐開元十七年置縣在橫野軍城  
內其後移理不定 故武郡城冀州圖云梁郡城  
在鄯陽北二十里卽尒朱榮所居 秀容川按川  
東北接恆州南接肆州西限大河北接朔州東西  
六百里南北四百餘里 楊泉冀州圖云後魏太  
和中文明皇太后來幸遂釣得鯉魚一雙皆長三  
尺以黃金爲鎖穿鰓放于池內後皆長五尺其一  
浮天爲五色虹而去久之而滅後一在池至孝昌  
元年六月行臺元淵北伐頓此決池取魚鱗甲非  
常而淵忍而殺之得金二觔八兩淵來年爲葛榮  
所殺 句注山在縣東南八十里 河水在縣西  
南三百里

馬邑縣

東三十里二鄉

本漢縣屬鴈門郡自後魏末陷入虜

中唐貞觀以來爲大同軍城其地屬鄯陽縣理至  
開元五年分鄯陽縣東三十里置大同軍以戍邊



復于軍內置馬邑縣徵舊名也此邑自置有戶無  
稅建中年間河東節度使馬燧權移州于馬邑縣  
桑乾河在縣東三十里源出于北山下 廢單  
于都護府在州西北三百五十七里本秦漢時雲  
中郡城也唐龍朔三年置雲中都護府麟德元年  
改爲單于大都護府振武軍在城內管金河縣一  
與府同置今竝廢

校勘

朔州

鄯陽縣

紇真山冀州圖云

按太平御覽書目有冀州圖經今記凡舉  
圖經但云圖閒亦有云圖經者今皆仍其  
故

太平寰宇記卷之五十一終

太平寰宇記

卷之五十一

上



太平寰宇記卷之五十二

河北道一

孟州

孟州

河陽郡今理河陽縣

禹貢爲冀豫二州之域卽武王伐紂

師會盟津在周爲畿內蘇忿生之邑後爲晉邑故左傳云文公大敗楚師襄王自往勞之書曰天王狩于河陽是也後屬魏魏哀王改爲河雍至漢又爲河陽縣魏晉因之屬河內郡後入後漢劉聰後秦姚泓亦如之後魏莊帝時梁陳慶之來伐克洛陽渡河守北中府城卽今河陽城也按城本太和



中所築至北齊得其地天保七年省邑額賦升入  
溫軹二縣以城卽爲軍戍故北齊書云神武使潘  
樂鎮北中城又使高永樂守南城以備西魏其中  
渾城卽東魏所築仍置河陽關以是之後將帥有  
河陽三城使隋開皇十六年又置河陽縣以屬懷  
州唐武德初改爲大基縣四年平王世充隸盟州  
八年省之咸亨五年復置大基縣于今理後以諱  
復爲河陽縣開元初年以溫河陽汜水濟源河清  
五縣爲東京畿邑屬河南府其稅權隸三城使至  
德中李光弼禦史思明之寇也光弼移牒留守河

南尹令留司官坊市居人悉出避寇空其都城乃  
出麾下士馬數萬東守河陽三城賊初謂光弼自  
洛而西及聞係河陽出其意外久之不敢犯宮闕  
光弼訓練招集威聲大振賊雖入城憚光弼威兵  
南不出百里西不越畿內陝州得修戎備關內無  
虞皆光弼係河陽之力會昌三年中書門下奏河  
陽五縣自艱難以來割屬河陽三城使其租賦色  
役盡歸河陽河南尹但總管名額而已使歸一統  
便爲定制旣是雄鎮足壯三城其河陽望升爲孟  
州尋有敕割河陰隸孟州河清還河南府時河陽



節度使以懷州爲理所會昌四年又割澤州隸河陽節度使仍移理所于孟州皇朝爲河陽軍節度使

領縣五

河陽 温縣 汜水 河陰 濟源

州境

東西二百九十四里 南北五十里

四至八到

東南至東京三百五十里

西南至西京七十里

西南至長安九百十里

東至滑州四百四十里

西至絳州五百六十里

南至汝州二百五十里

北至懷州七十里

東至鄭州二百里

東北至衛州三百二十里

西北至澤州二百里

戶

舊戶載河南府



皇朝戶主一萬四千二百三十五客七千五百五十七

風俗

河南覃懷之地于周為畿內今所管縣本屬河內

故風俗與周地略同漢書云子男之國號為大國號

即今汜水縣也恃勢與險崇侈貪冒

人物無

土產

古貢黃魚鮓 今貢梁米 石榴

河陽縣依舊三鄉本周蘇忿生之邑後為晉邑城西臨黃

河即古盟津之地秦為河雍縣漢為河陽縣以在

河之北為名屬河內郡今縣西北三十五里有古

城即漢理冀州圖云河陽在河內郡南六十四里

有宮有關魏晉如之潘岳曾為令高齊省入温軹

二縣隋開皇十六年分温軹二縣重置屬懷州唐

武德四年平王世充後割屬河南府今屬孟州

嶺山在縣西北三十里岡嶺橫互故以為名 孟

津夏禹將興神龜負圖出洛并武王觀兵皆此津

也蘇忿生十二邑有盟今平陰縣北孟津是也或

謂之富平津或謂之小平津或謂之陶河渚即異



名也今在縣南卽魏尙書僕射杜畿試船沈沒之所尋立爲河湯關是也 南浮橋在縣南一里卽泰始十年杜征南造晉武帝勞預曰非卿不能造此橋預對曰非陛下聖明臣不能施其功卽此橋也 北中府城卽郡城也洛陽記云太和二十年造北中府城又有南城與縣接乃東魏元象二年所築高齊于其中置行臺周武帝平齊又改爲河陽鎮隋煬帝又改置河陽宮後入唐宮廢 古城在縣西三十里卽天王所狩之地 板城在縣西北三十五里左氏傳隱公十一年王以易鄭餘邑

卽此 踐土城冀州圖云在縣東七里洛陽西北四十二里左傳盟于踐土是也 向城卽春秋十二邑之一在今縣西北二十五里古向國春秋謂向姜不安莒而歸 閻坎左傳周甘人與晉閻嘉爭閻田一名閻坎今解縣是也 遮馬堤在今縣西南十三里卽後魏尔朱榮殺朝士千三百人于此堤

温縣

東北五十里舊七鄉今五鄉

本周畿內司寇蘇公之邑春秋

僖公十年狄滅温温子犇衛周襄王勞晉文公而賜之漢以爲縣屬河內郡隋屬懷州大業十三年



自故温城移于今所唐武德四年隋温縣令周仲  
隱以縣歸乃以縣置平州以仲隱刺焉因改邑城  
爲李城其年廢州復爲温縣以屬孟州後以建都  
河洛因以隸焉自天寶之後稅賦輸河陽會昌中  
于河陽置孟州以縣隸焉 馬場原俗謂原爲坎  
蓋後魏遷都洛于此原牧馬故有馬場之名 泚  
水在故城西東南流注于河按述征記云泚水經  
河內温縣注于河又九州記云濟水一名泚水出  
濟源山 李城今縣城是也本李侯國史記秦圍  
邯鄲傳舍吏子李同說平原君得敢死之士三千  
人赴秦軍爲卻三十里亦會楚魏救至秦軍遂罷  
李同戰死封其父爲李侯徐廣曰河內平皋縣有  
李城 號公臺俗名賀酒臺皇覽云河內温城南  
有號公臺相傳云晉宣帝故邑集温父老登此臺  
宴飲父老奉觴慶賀因謂之賀酒臺 古温城在  
縣西南三十里周司寇蘇忿生邑漢爲縣東魏孝  
靜帝天平中移縣于故城東北七十里隋大業十  
三年又移縣于今理

汜水縣

東北九十里舊三鄉今四鄉

古東虢國春秋鄭之制邑漢

爲成皋縣屬河南郡左傳謂制巖邑也虢爲鄭所



滅穆天子傳云天子獵于鄭國有虎在葭中七萃之士擒之以獻命畜之東虢號曰虎牢今邑界有虎牢城存焉戰國屬韓秦屬三川楚漢相拒于滎陽成臯卽此地後爲縣北臨黃河後漢爲成臯關魏又爲縣復屬河南郡晉隸滎陽郡宋武帝北平關洛置司州後魏明帝置北豫州太和十九年罷州置中郎將府孝靜帝天平元年罷府又置北豫州并成臯郡同理于此高齊天保七年省北豫州周宣帝宣政元年置滎州隋開皇元年改爲鄭州三年置成臯郡十六年分鄭州置管州十八年改

爲汜水縣唐武德四年分置成臯縣貞觀元年省入汜水縣以屬鄭州顯慶二年改屬河南府垂拱四年改爲廣武縣神龍元年復爲汜水縣會昌中屬孟州黃河自鞏縣界流入汜水出縣東南四十二里三山山有三峯故以爲號鵲山在縣北竇建德軍敗于此方山在縣東南四十二里山海經云浮戲之山汜水出焉水經注云浮戲山俗謂之方山經武牢城東漢破曹咎于此旋門坂在縣西南十里東京賦云東門于旋又西征賦云望河洛之交流看成臯之旋門汜水有二



馬竝在鄭地春秋天王出居于汜是南汜在許州襄城縣界非此也今在成皋城東按京邦要記云板渚牛口渚在汜水縣東北郡國縣道記云汜水出縣南方山經縣東始合于河 厄井在縣東北七十里風俗通謂漢高祖與項羽戰敗于京索遁入蒲井鳩止鳴其上追者以爲無人遂得脫因名厄井又九州要記云丁公抱石欲填之是此井郡國志云堯井在縣東十五里卽厄井也未明孰是板城城東北三十里有津亦謂板渚 虎牢城卽其叔段之邑也 成皋故關在縣東南二里南

門名成皋北門名王路洛陽記云洛陽在四關之內左成皋關隋大業九年移成皋關于虎牢城西邊黃河當汜水之上按故關在縣東今在縣西旋門關在縣西南十里卽八關之一也 牛口渚在縣北與板渚迤邐相接唐初竇建德率眾十萬自板渚結陣南屬鵠山以臨汜水太宗率輕騎擊之大潰建德竄入牛口渚將軍白士讓生獲之先是童謠云豆入牛口勢不得久果敗于此 等慈寺在縣東七里唐師旣破建德有詔于戰所起寺立碑以紀功焉 河侯神在縣東北四十里隋開



皇七年通渠之日於大河分流之處立此祠往來商賈禱祀不絕焉

河陰縣

東北一百二十里舊三鄉今二鄉

其地卽汜水滎澤武陟三

縣之地也開元二十二年侍中裴耀卿奏以地當汴河口便于漕運宜析上三縣之地置縣以頓之因在河之南故于輸場東渠口北二百五十步立河陰縣焉卽今理所 三皇山亦曰敖郟山山上有三城卽是楚漢相持于此 汴渠在縣南二百五十步首受黃河一名通濟渠一名蒗蕩渠漢書謂滎陽漕渠如瀉曰今礫溪口是也水經云河水

又東過滎陽北蒗蕩渠出焉酈道元注云大禹塞滎澤開渠以通淮泗又後漢書初平帝時河汴決壞未及得修汴渠東侵日月彌廣水門故處皆在河中永平十二年議修汴渠乃引樂浪人王景問治水形便景陳其利害應對敏給帝善之乃賜景山海經河渠書禹貢圖及錢帛秘物遂發卒數十萬遣景與將作謁者王吳修渠築堤起自滎陽東至千乘海口千餘里景乃商度地勢鑿山截澗防遏衝要疏決壅積十里立一水門令更相澗注無復潰漏之患明年渠成帝親巡行詔濱河郡國置



河堤員吏如西京舊制順帝陽嘉中又自汴口以東緣河積石爲堰通淮亦名金堤靈帝建寧中又增修石門以遏渠口又坤元錄云自宋武北征之後復皆堙塞隋大業元年更令開導名爲通濟渠西通河洛南達江淮煬帝遊江淮于此泛龍舟至江都其交廣荆揚益越等州運漕卽此渠也 梁王堰在縣西二十里又名梁公堰本漢平帝時汴河決壞至明帝永平中乃令王景理梁堤其後通塞各計朝代隋開皇七年使梁睿增修古堰遏河入汴故謂之梁公堰

濟源縣

西北四十里  
依舊四鄉

卽周畿內地亦蘇忿生之邑今

古城尙存在縣西北二里左傳云襄王賜晉文公濟西之田後屬魏漢爲軹縣之地隋開皇十六年分軹地立濟源縣屬懷州以濟水發源于此爲名隋末省軹入濟源唐武德二年王世充將丁伯得以邑歸順遂于此置西濟州以濟源溟陽蒸川邵原四邑以隸焉仍以伯得爲刺史四年省縣入懷州顯慶二年建都河洛以隸之會昌中復隸孟州太行山相傳謂皇母山也或名女媧山其上有祠民祈福而歲禱焉其山起于邑界 陵山爾雅



云大阜爲陵俗以孤絕似陵因謂之陵山 孔山  
在縣東北四十里水經注云山上石穴洞開穴內  
石上有車轍馬跡自然成著非人功所就 沁水  
在今縣北二十八里兼有故沁水城是此 濟水  
在縣西北三里平地而出有二源其東源周迴七  
百步其深不測西源周迴六百八十五步深一丈  
皆繚之以周墻源出王屋山山海經云王屋之山  
澗水出焉郭璞注云澗沈水之源尙書禹貢云導  
沈水東流爲濟入于河溢爲滎孔安國注云濟水  
入河竝流數十里而南截河又竝流數里溢爲滎

澤按禹貢導沈水東流爲濟入于河溢爲滎東出  
于陶邱北又東至于菏又東北會于汶又北東入  
于海顏師古云導沈水而爲濟截河又爲滎澤陶  
邱在今曹州定陶西南過菏澤又與汶水會北折  
而東入海也按沈水出今王屋縣王屋山東流至  
濟源縣而名濟水滎澤在今鄭州滎澤縣定陶今  
曹州濟陰縣是也菏澤在今兗州魚臺縣汶水在  
今兗州萊蕪縣然濟水因王莽末旱渠涸但入河  
而已不復截河南過今東平濟南淄川北海界中  
有水流入于海謂之清河實菏澤汶水合流亦曰



濟河蓋因舊名非本濟水也而水經是和帝以後所撰乃言濟水南過滎澤至于乘氏等縣一依禹貢舊道斯不詳之甚也酈道元又從而注之其所纂序尤爲紕繆矣又九州記云濟源縣有慢流水玉漿澗木溝皆會于濟也 皮城在城東南三十里卽春秋時陽樊邑 忿生邑有故城在今縣西北二里 軹縣故城史記云秦昭王伐魏取軹漢爲縣故城在今縣東南三十里卽漢文帝封舅薄昭爲軹侯是此高齊拒周使斛律光築關于此以屯戍卒按郡國縣道記云後魏自此城移縣于

今縣東南二十八里皮城置大業二年省之 濟源古城在古縣西北九里卽史記謂晉文公伐原是也 陵山在城西北 靈井東魏以鎮西將軍平鑿爲懷州刺史乃于軹關築城以防西魏新城少水有一土井隨汲卽竭鑿乃具衣冠俯井而祝俄而井泉涌出合城不缺此井今在故城中 沁臺在縣東北三十里與古城相去五里 故軹關在今縣西十一里

校勘

孟州



河陽縣

板城

按板城莫知為何邑疑刊字而誤然無所考

太平寰宇記卷之五十二終

太平寰宇記卷之五十三

河北道二

懷州

懷州河內郡今禹貢冀州之域星分張宿九度禹貢

覃懷底績至于衡漳太行山在焉殷時為畿內周

時為三監邶鄘衛地亦為衛邶雍三國及管蔡廢

黜封康叔以為懷侯于此地即為衛衛遷河南晉

文公霸始啟南陽又為晉地故左傳襄王賜晉文

公陽樊温原攢茅之田晉于是始啟南陽杜預注

云在晉山之南河之北故曰南陽也又曰武王克



商蘇忿生以温爲司寇其田有隕懷戰國時爲魏  
衛二國之境史記云秦襄王伐魏取軹又竹書紀  
年云秦師伐鄭至于懷殷始皇并天下以今州地  
屬三川河東二郡又按史記始皇六年拔衛其君  
徙居野王阻其山以休之胡亥廢衛君角爲庶人  
以其地屬三川河南二郡之境河東郡之東境史  
記云項羽立司馬卬爲殷王河內漢高帝初又  
爲殷國至二年卬降以其地爲河內郡治懷舊壤  
卽覃懷故地漢書地理志云魏地東盡河內領懷  
等一十八縣屬于司隸後漢世祖南定河內難其

守鄧禹舉寇恂世祖謂恂曰河內完富吾將因是  
而起昔高祖留蕭何鎮關中吾今委公以河內恂  
遂伐淇園之竹治矢百餘萬養馬二千匹收租四  
百萬斛以給軍事由是東漢之業濟焉晉爲河內  
汲二郡地後魏置懷州兼置河內郡治古野王城  
是也隋開皇三年郡廢而州存十三年改野王縣  
爲河內縣大業二年州廢復爲河內郡唐武德二  
年陷于王世充其年以濟源西南柏崖城置懷州  
領大基河陽集城長泉四縣其年于濟源立西濟  
州武德縣立北義州修武縣東北故濁鹿城立陟



州懷州置總管府管懷西濟北義陟四州三年懷  
州又置太行紫陵忠義穀旦温五縣四年移懷州  
于今野王城其年又于温縣置平州以温縣屬之  
又省穀旦太行忠義紫陵四縣後省平州仍于隋  
河陽宮置盟州領河陽集城温三縣又省西濟北  
義陟三州又于獲嘉縣置殷州其懷州總管管懷  
殷盟三州懷州領河內武德軹濟源四縣八年廢  
盟州省集城入河陽以河陽温二縣來屬貞觀元  
年罷都督府以廢殷州修武獲嘉武陟廢邵州之  
王屋四縣來屬仍省懷軹二縣顯慶二年割河陽

温濟源王屋四縣屬洛州天寶元年改為河內郡  
乾元元年復為懷州

領縣五

河內 武德 修武 武陟 獲嘉

州境

東西二百一十七里 南北一百一十五里

四至八到

東南至東京三百三十里

西南至西京一百四十里

西南至長安八百七十九里



東至衛州二百六十里

南渡河至鄭州一百九十里

西至河南府濟源縣七十三里

北至澤州一百四十里

東南至鄭州一百五十六里

西南至河南府一百四十里

西北至河南府界一百七十里

東北至衛州二百六十里

戶

唐開元戶四萬三千一百七十

皇朝戶主一萬一千三百五十六客三千五百六十八

風俗

河內覃懷之地于周爲畿內今所管縣本屬河南故風俗與周地略同漢書云子男之國虢鄆爲大虢國卽今汜水縣也

姓氏

河內郡八姓 梁 何 車 常 荀 淳于

司馬

人物



聶政

軹人

四皓

軹人

張禹

字子文河內軹人代王商為丞相

郭解

字翁伯軹人

丁蘭

河內人

郭巨

河內人

張奉

河內人

修武人有孝行子表字公儀遭奉喪表後每彈琴惻愴不能成聲

司馬朗

九歲喪父黨造門問

人道其父字朗曰慢

常林

年七歲父黨造門問

答曰臨子字

王象

字義伯河內人少孤貧牧羊

父何拜之有

山濤

河內懷人為

山簡

字季倫濤子由

世稱

儒宗

督出鎮

向秀

河內人

向柳

字立季

藥

荆楚

向雄

河內人為郡主簿太守王經

向秀

河內人

向柳

字立季

藥

唐李商隱

河內懷州人

司馬承禎

河內温人隱天台

道錄

穆寧

懷州河內人有家法

張鎬

懷州人起家

土產

絲

絹

綿

絕

朱膠

河內縣

舊二十一鄉今六鄉

春秋時野王邑左傳晉人執晏弱

于野王杜預云河內野王縣也七國時屬韓漢為

野王縣屬河內郡隋開皇十三年改野王為河內

縣因晉徙河內郡于此為名唐武德四年自柏崖

城徙郡于此太行山在縣北二十五里禹貢曰

太行恆山至于碣石注云二山連延接碣石左傳

齊侯伐晉為二隊入孟門登太行穆天子傳曰天

子命駕八駿之乘赤驥之駟南征翔行逕絕翟道



升于太行南濟于河淮南子曰武王欲築宮于五行之山周公曰五行險固德能覆也高誘注云今野王太行山也今上有孔子廟石室 太行陁在縣西北三十五里連山中斷曰陁述征記云太行山首始于河內北至幽州凡百嶺巖互十二州之界有八陁第一軹關陁今屬河南府濟源縣在縣理西十一里第二太行陁第三白陁此兩陁今在河內第四溢口陁在鄴西第五井陘第六飛狐陁一名望都關第七蒲陰陁此三陁在中山第八軍都陁在幽州太行陁闊三步長四十里 沁水在

縣北四里北自濟源界流入 丹水北去縣七里東北自澤州沁水縣界流入分溝灌溉百姓資其利焉 濟水經縣西南去縣三十里 大臺水後漢光武遣王梁擊赤眉賊處 新城壘在縣東北九里唐武德三年劉德威于此置營 古軹城在縣西北二十七里今軹城太行之南道出其中 紫陵澗唐武德三年置紫陵縣縣近澗因以爲名 古野王城冀州圖云野王城卽今懷州理也史記云衛元君爲秦所奪自濮陽徙此 嵇康鍛竈康卽晉之七賢也今有竹林尙存并鍛竈之所宛



在 孔子廟夫子欲北之趙趙鞅殺大夫竇鳴犢  
夫子至此聞之傷悼遂不過河今有夫子廟

武德縣

東北四十七里舊二十鄉今五鄉

本周司寇蘇忿生之州邑

漢以爲縣屬河內郡東魏于此置武德郡隋文帝十六年改爲邢邱縣大業二年改邢邱爲安昌縣唐武德二年改安昌爲武德縣 太行山在縣北五十里 沁水在縣北二里東流 平皋陂在縣南二十三里陂多菱蓮蒲葦百姓資其利周迴二十五里陂南卽黃河 安昌故城在縣東南十里漢成帝封丞相張禹爲安昌侯卽此地 南北斗

城冀州圖云南斗城在今縣北三十里北斗城在縣北五十一里又郡國縣道記云武德有故雍城在縣西北三十五里疑此是也 平皋城在今縣西左傳赤狄伐晉圍懷及邢邱注云邢邱今河內平皋縣是也漢置平皋縣又高祖封劉它爲平皋侯 故大斛關在縣北一百六里

修武縣

東北一百二十里舊十五鄉今五鄉

本殷之甯邑韓詩外傳云

武王伐紂勒兵于甯故曰修武左傳曰晉陽處父聘于衛過甯注云汲郡修武縣是也漢以爲縣屬河內郡東魏置西修武縣尋省高齊天保七年自



今獲嘉縣移修武縣于西修武故城隋大業十年  
又移于永橋卽今武陟縣其城又空復移于今縣  
東北二十三里濁鹿故城置卽魏帝受禪所也唐  
武德二年于濁鹿城置陟州領修武縣四年州廢  
屬殷州六年又移修武于廢西修武故城卽今理  
也貞觀元年省殷州屬懷州 太行山在縣北三  
十二里 天門山今謂之百家巖在縣西北三十  
七里以巖下可容百家因名上有精舍又有鍛竈  
處所云卽嵇康所居圖經云巖有劉伶醒酒臺孫  
登長嘯臺阮氏竹林嵇康淬劍池竝在寺之左右

山陽城北有秋山卽嵇康之園宅也 五里泉

水經注五里泉在修武鄉 濁鹿城在今縣西北

三十七里魏志文帝受禪封獻帝爲山陽公居河  
內山陽之濁鹿城卽此城周迴一十五里尙在

禪陵在縣北三十五里獻帝陵也以禪魏故名焉

武陵故城在縣南二十五里東魏置太寧郡後

周廢 太寧城在縣東南三十八里舊名西邸閣

城 習鑿齒墓在縣西南太平鄉一作郡

武陟縣東南一百里舊本漢懷縣地隋開皇十六年

分修武縣置武陟縣理故城今縣東二十里武德



故城是也屬殷州唐貞觀元年省殷州屬懷州  
沁水在縣東一里 故殷城在縣東南十里楚漢  
之際司馬卬爲殷王理此 故懷縣城春秋傳云  
赤狄伐晉圍懷卽此在縣西十一里兩漢河內郡  
並理之晉移郡理于野王

獲嘉縣

南北一百六十里  
舊二十鄉今七鄉

春秋時甯邑地漢爲獲嘉

縣按漢書曰武帝將幸緱氏至汲縣之新中鄉得  
南越相呂嘉首因立爲獲嘉縣屬河內郡此前獲  
嘉縣理在今衛州新鄉縣西南十里獲嘉故城是  
也西晉曾立爲殷州高齊又移獲嘉縣于衛州之

其城縣隋開皇四年自其城移于今理十六年又  
立殷州唐初州廢復爲縣還河內 黃河在縣南  
四十里 清水酈道元注水經云黑山在縣北白  
鹿山東清水所出也上承諸陂散泉積以成川南  
流西南屈瀑布垂巖懸河注壑二十餘丈又冀州  
圖云清水出其城西北界白鹿山東南流入汲郡  
吳澤陂在縣西北一十五里 七賢祠在縣西  
北四十二里阮籍等遊處水經注云七賢祠左右  
筠篁列植冬夏不變向子期所謂山陽舊居卽此  
祠之處也 同盟山在縣東北五里武王伐紂與



諸侯同盟此山因名焉

太平寰宇記卷之五十三終

太平寰宇記卷之五十四

河北道三

魏州

博州

魏州

魏州

魏郡今理大名元城二縣

禹貢兗冀二州之域在夏即為觀

扈之國星分畢昴春秋為晉地戰國為衛魏二國

之境秦滅魏置東郡滅趙置邯鄲郡漢高祖使韓

信定河北以秦邯鄲郡之南部并東郡之邊縣置

魏郡即今元城縣地是也後漢封曹操為魏王理

鄴自漢至魏晉郡皆在鄴前燕慕容暉都鄴于今



州理置貴鄉郡尋省周靜帝大象二年又于貴鄉郡之東界置魏州隋大業三年罷州爲武陽郡唐武德四年平竇建德復爲魏州又分置漳陰縣領貴鄉昌樂元城莘武陽臨黃觀城頓邱繁水魏冠氏館陶漳陰十三縣其年割頓邱觀城二縣置澶州又割莘臨黃武陽三縣置莘州又割冠氏館陶置毛州魏州置總管府管魏黎澶莘毛五州魏州領貴鄉昌樂繁水漳陰元城魏六縣貞觀元年罷都督府仍省漳陰縣其年廢莘毛澶三州盡以所領縣屬魏州十七年省元城武陽觀城三縣十八

年省繁水縣龍朔二年改爲冀州大都督府以殷王爲都督督冀貝德相棣滄魏七州咸亨三年依舊爲魏州罷都督府永昌元年置武聖縣聖曆二年又置元城縣天寶元年改爲魏郡乾元元年復爲魏州天祐三年割貝州之夏津臨清永濟宗城經城相州之內黃成安洹水博州之清平來屬從魏府之所請後唐同光元年升爲東京興唐府三年改爲鄴都晉天福初改爲廣晉府漢乾祐元年改爲大名府周顯德元年依舊爲天雄軍節度使其大名府額仍列在京兆府之下皇朝因之



元領縣十

今十七

大名 元城 南樂 魏縣 館陶 冠氏 莘

縣 朝城 夏津 臨清 永濟 宗城 經城

已上五縣 貝州割到 清平 博州割到 內黃 成安 洹水 已

三縣相 州割到

二縣割出

頓邱 臨黃 並入 瀆州

州境

東南二百四十里 南北三百二十里

四至八到

東至東京四百里

西南至西京七百五十里

西南至長安一千六百一十里

東至博州武水縣一百三十七里

正東微北至博州一百八十里

南至相州一百六十里

西至相州一百一十里

北至貝州二百一十里

東南渡河至濮州一百九十里

西北至洛州平恩縣界九十四里



東南渡河至鄆州二百三十里  
西北至洛州一百六十里

戶

唐開元戶一十一萬七千一百七十五

皇朝戶主五萬五千九百八十七客二萬九百八十五

風俗

毛詩云魏地狹隘其人機巧史記云邯鄲亦漳河  
之間一都會也北通燕涿南有鄭衛鄭衛俗與趙  
相類然近梁魯微重而矜節漢書云邯鄲土廣俗

雜大率精急高氣勢

姓氏

魏郡五姓

申

暴

柏

暢

一作鳴

長

一作葛

人物

蓋寬饒

魏郡人為司隸校尉刺舉

欒巴

內黃人

無所迴避公卿貴戚皆懼

東皙

字廣微元代人官著作郎

唐郭震

字元振魏州館陶人

谷那律

魏州昌樂人博洽羣

累軍功封代國公

劉祥道

魏州觀城人

沈

佺期

字雲卿內黃人與宋之

李義珍

魏州昌樂人為相高

宗欲令武后預知國

張萬福

元城人官

吳保



安平

魏州人

路巖

冠氏人在相位八年

土產

絹

貢

絲

綿

絕

紬

貢

枝頭乾

漢書云

冀州其利松柏

大名縣

舊三十鄉今六鄉

本漢元城縣地後魏孝文太和二

十一年分置貴鄉縣因前燕慕容暉之貴鄉郡以

名之屬昌樂郡按水經注云沙邱堰有貴鄉謂此

也隋開皇三年罷郡縣屬魏州大業三年改屬武

陽郡唐武德初割屬魏州後唐改為廣晉縣漢乾

祐初改為大名 愜山在縣西九里古堰也今名

愜山漢成帝時河決金堤使者王延世于此運土

以塞河頗愜當時人心故謂之愜山 大河故瀆

在縣東三里俗名王莽河水經注云故瀆又東北

經元城西北至沙邱堰昔禹治洪水播為九河自

此始也 屯氏河俗名毛河水經注云大河故瀆

北出為屯氏河漢書溝洫志曰自塞宣房河復北

決于館陶分為屯氏河廣深與大河等 西渠開

元二十八年九月刺史盧暉移通濟渠自石灰窠

引流注于城西夾水制樓百餘閒以貯江淮之貨

故有西渠之名 州城前燕慕容暉所置也周宣



帝于此置州理焉

元城縣

舊三十鄉  
今六鄉

本漢舊縣屬魏郡應劭曰魏武侯

公子元食邑于此國因氏焉又魏書吳質爲元城令文帝枉鄴騎卽謂此邑高齊省元城縣入貴鄉隋開皇六年復置唐貞觀十三年又省入貴鄉聖厯二年重置開元十三年移于州東北三百步後唐改爲興唐縣晉復爲元城 沙麓在縣東十二里亦名女姓邱春秋經云沙麓崩注云晉地也漢書云王翁孺旣徙魏郡元城委粟里元城建公曰昔春秋沙麓崩晉史卜之曰後六百四十五年當

有聖母興其齊田氏乎今翁孺徙居正直其地日月當之元城郭東有五鹿之墟卽沙麓地也後八十年有貴女興天下云其後平帝幼小元后果臨朝稱制也 五鹿墟在縣東左傳謂晉公子重耳乞食于五鹿野人與之塊卽其處也 馬陵在縣東南十里魏攻韓韓告急于齊齊使田忌將而孫臧爲師使齊軍入魏地爲十萬竈明日爲五萬竈又明日爲二萬竈龐涓大喜曰我固知齊卒怯入吾地三日士卒亾去者過半乃倍行逐之孫臧度其暮至馬陵乃大斫樹白書曰龐涓死于此下于



是令善射者萬弩夾道而伏期見火舉而俱發龐涓夜至斫木下見白書乃鑽火燭之齊軍萬弩俱發魏軍大亂涓自刎 王翁孺墓在縣東二百步漢書王翁孺既免居委粟里即元后之祖也 束皙墓在縣南二十五里

南樂縣

南十五里舊三十鄉今七鄉

本漢舊縣屬東郡後魏孝文

于漢舊樂昌縣城置昌樂郡及昌樂縣周武帝改屬魏郡隋罷郡改屬魏州今改名南樂 王莽河西去縣十六里 平邑竹書紀年云晉烈公四年趙城平邑按縣圖云在縣城東界

魏縣

西四十里舊十六鄉今四鄉

本漢舊縣屬魏郡後魏孝文帝

分魏縣置昌樂縣高齊省魏縣入昌樂縣隋開皇六年又分昌樂置魏縣依舊屬魏州 漳河舊漳河在今縣西北十里即史起所決以灌鄴旁者新漳河在今縣西北二十一里 白溝水北接館陶界隋煬帝導為永濟渠亦名御河南自相州洹水縣界流入又北阿難河出焉蓋魏將阿難所導以利衡瀆故此瀆有阿難之稱矣又唐史開元二十八年魏州刺史盧暉開通濟渠自石灰窠引流至州西都注魏橋夾州製樓百餘間以貯江淮之貨



是此渠 蓋寬饒墓在縣東南八里 狄仁傑祠  
在縣東南四里為魏州刺史百姓為立祠

館陶縣

北五十里舊十  
五鄉今五鄉

本春秋時晉冠氏邑也陶邱

在縣西北七里爾雅曰再成為陶邱趙時置館于  
其側因為縣名漢時屬魏郡魏文帝改屬陽平郡  
石趙移陽平郡理此周大象二年置毛州以近河  
為稱隋大業二年廢毛州以館陶縣屬魏州 金  
堤漢武時河決館陶及東郡金堤謂此地也 大  
河故瀆俗名王莽河東去縣四里 屯氏河俗名  
毛河在縣西二里 白溝水煬帝導為永濟渠亦

名御河西去縣十里

冠氏縣

東北六十里舊二  
十五鄉今四鄉

本漢館陶縣地隋開皇六

年分館陶東界置冠氏縣因古冠氏邑為名屬毛  
州煬帝大業二年廢毛州冠氏縣屬魏州 黃河  
郡國志云俗名黃壘 王莽河北去縣十八里  
冉仲弓墓在縣北二十五里

莘縣

東七十五里舊二  
十一鄉今五鄉

本衛地漢為陽平縣屬東郡

周武帝建德七年于此置武陽郡在武水之陽因  
以為名隋開皇八年改陽平縣為清邑縣十六年  
于縣置莘州十八年改樂平縣為莘亭大業二年



廢莘州縣屬魏州其年改清邑爲莘縣因縣北古莘亭爲名唐武德初又置莘州貞觀元年州廢來屬汲壽爭相爲死卽此地 冰井水經注云武陽大城西門有冰井門內有古冰井猶在 莘亭在縣北卽左傳云使盜待諸莘是也 武陽臺水經注云武陽城有一石臺在大城門外號曰武陽臺 武陽故城在今縣之南卽後周置郡于此 二子祠顧野王輿地志云陽平之莘有衛宣公二子爭死處今有祠存 頓城郡國志云頓城在武陽東南十里臧洪爲東郡守理于此城

朝城縣

東南八十里舊十八鄉今四鄉

本漢東武陽郡在武水之陽

故曰武陽其後爲縣屬魏郡隋開皇十六年隸莘州大業二年廢莘州屬魏州唐貞觀十七年縣廢永昌元年又置改名武聖開元七年改爲朝城

武河在縣東十步 黃河在縣東二十九里 武

陽臺在縣西南一里 扁鵲墓在縣羅城西北隅

夏津縣

東北二百五十里舊十三鄉今三鄉

本漢靈縣地漢初爲鄒縣

按漢書高后封呂佗爲鄒侯田蚡奉邑亦在鄒卽此地志云鄒縣屬清河郡故城在今德州西南五十里是漢鄒縣理所後魏省隋開皇十六年復于



此立鄒縣唐天寶元年改為夏津縣今屬魏州

大河故瀆在縣東三十六里 屯氏河在縣北

臨清縣 西南一百五十里 舊五鄉今六鄉 本漢清淵縣地後魏孝文

帝太和二十一年于此置臨清縣屬魏郡高齊省

隋開皇六年復置臨清縣屬毛州十八年州廢縣

屬貝州唐大厯七年于縣西南張橋店置永濟縣

同時以滄州景城縣隸瀛州貞元已後復自瀛州

隸貝州 貝邱在今縣東南十五里有漢貝邱縣

故城存城中有貝邱高五丈周迴五十步兼有後

漢貝邱長博陵劉伯言北海苑孟興二碑竝文磨

滅後魏初移縣于故城東北十里今縣東又有貝

邱城即後魏所治 屯氏河在縣西十五里

永濟縣 北九十里 元四鄉 本漢貝邱縣地隋已後為臨清縣

地唐大厯七年田承嗣奏于張橋店置此縣以邑

西臨永濟渠故以為名今屬魏州 永濟渠在縣

西南自汲郡引清淇二水東北入白溝穿此縣入

臨清按漢武時河決館陶分為屯氏河東北經魏

郡清河信都渤海入海此渠蓋屯氏古瀆隋氏修

之因名永濟

宗城縣 西北一百七十里 舊十五鄉今五鄉 本後漢章帝分鉅鹿地立



廣宗縣屬鉅鹿郡後魏于縣理置廣宗縣屬清河郡隋開皇三年罷郡仁壽元年改廣宗為宗城縣唐武德四年于此置宗州領宗城縣九年廢宗州以縣屬貝州今屬魏州 枯漳河在縣東二十七里 袁公橋在今縣東卽後漢袁紹破公孫瓚于此橋故謂袁公橋 張甲河在縣南二十七里

經城縣

西北二百三十里舊二十鄉今四鄉

本後漢之經縣地分前漢

堂陽縣于今縣西北二十里置經縣後魏初省併南宮縣太和十年又于今理置經縣續于縣理置廣宗郡高齊天保七年省郡及縣仍移武強縣于

此後周武建德七年復于此置廣宗郡隋開皇三年罷郡六年移武強縣于武強城南置復于此置經城縣屬貝州今屬魏州 張甲枯河在縣東十里

清平縣

東北一百八十里舊十鄉今四鄉

本漢清陽縣地屬清河郡

隋開皇六年自今貝州清河縣界移貝邱縣于今理屬貝州十六年改貝邱為清平縣屬博州大業二年省博州改屬貝州隋亂廢唐武德四年重置屬博州今屬魏州 王莽河在縣南十八里

內黃縣

西南一百二十四里舊十八鄉今四鄉

漢舊縣屬魏郡魏以河



北爲內河南爲外以陳留有外黃此爲內黃後魏  
省隋開皇六年于故城東南十九里置內黃屬相  
州唐武德二年于黎陽縣置黎州縣屬馬貞觀十  
七年廢州縣還相州今屬魏州 黃澤在縣西北  
五里 博望岡在縣東南十三里接汲縣界 蕩  
水水經曰蕩水又東北至內黃縣入于黃澤 兒  
渠前漢兒寬遷內黃令吏民大信服開六輔渠以  
大灌漑民獲其利因曰兒公渠 牽城在今縣西  
南十二里左傳公會齊侯于牽卽此 繁陽故城  
史記云趙將廉頗伐魏取繁陽是此地漢爲縣故

城在今縣東二十六里城因在繁水之陽以爲名  
辟陽城漢審食其封此故城在今縣東北五里  
故殷城在縣東南十三里殷王河亶甲居相因  
築此城 永濟渠北去縣二百步

成安縣

西一百里舊三鄉今三鄉

本漢斥邱縣地屬魏郡春秋時

乾侯邑也土地斥鹵故云斥邱後其地屬鄴縣高  
齊文宣帝分鄴縣置成安縣屬清都尹後周平齊  
屬魏郡隋開皇三年改屬相州今屬魏州 濁漳  
水西自滏陽縣界流入 斥邱城在縣東南三十  
里春秋時乾侯邑漢以爲斥邱縣左傳曰公如晉



次于乾侯 蚩尤冢在邑界

洹水縣 西南九十三里 舊十鄉今三鄉 本漢內黃縣地晉于此置長

樂縣屬魏郡後魏省孝文帝復為長樂縣高齊省

入臨漳縣周武帝分臨漳置洹水縣因水為名屬

魏郡隋開皇三年割屬相州今屬魏州 洹水西

自堯城縣界流入 鷓鴣陂在縣西南五里周迴

八十里蒲魚之利州境所資 白溝今名永濟渠

水經云白溝與洹水同

### 博州

博州 博平郡今理聊城縣 禹貢兗州之域春秋時齊之西界聊

攝地也平原郡聊城縣東北有故攝城即古聊攝

城也左氏傳引晏子云聊攝以東其為人多矣戰

國時亦為衛齊趙國交境之地秦兼天下置三十

六郡今州即秦之東郡也在漢為東郡之聊城縣

晉以聊城縣屬平原郡宋分其地置魏郡後魏明

元帝于此置平原鎮孝文帝罷鎮置平原郡葛榮

之據冀州也又于今理置冀州尋廢孝武帝復置

平原郡隋開皇三年罷郡十六年于今理置博州

大業三年省隋亂宇文化及弒逆自江都舉兵至

此竇建德攻陷其城殺化及復自據之唐武德四



年討平竇建德置博州領聊城武水堂邑茌平仍  
置莘亭靈泉清平博平高唐凡九縣五年省莘亭  
靈泉二縣貞觀元年省茌平縣天寶元年改爲博  
平郡乾元元年復爲博州

元領縣六 今四

聊城 堂邑 高唐 博平

一縣割出

清平

州入魏

一縣廢

武水

併入聊城縣

州境

東西一百八十九里 南北二百里

四至八到

西南至東京五百一十里

西南至西京九百三十里

西南至長安一千九百九十里

東渡河至濟州二百九十里

南至舊濟州七十里

正西微南至魏州一百八十里

西南至魏州冠氏縣八十六里



北至貝州一百三十里  
東南至舊濟州五十四里  
西北至貝州一百九十里  
東北至德州二百六十里

戶

唐開元戶三萬七千四百四十四

皇朝戶主一萬六千二百七客一萬三千三百三

十一

風俗 同魏州

人物

賈琮

字孟堅東郡聊城人

華歆

字子魚高唐人與邴原管寧善官太尉

劉

實

字子真高唐人累遷司空卒年九十二

劉智

字子房實弟官潁川守

唐

呂才

博州清平人善陰陽書又明音樂為太子率更大夫

馬周

字賓王荏平人為中

侍御史

孫揆

聊城人昭宗討李克用揆厚禮之揆使會戰克用伏兵執揆

大罵不屈

行揆曰死狗奴

鋸人須用木板

不

梁載言

聊城人歷鳳閣舍人

撰十道志

王志愔

聊城人為侍御史以剛鷲為治人呼為阜鵬

土產

綿

絹

平紬

聊城縣

舊二十鄉今三鄉

本春秋時聊攝地魯仲連射箭喻

燕將之所漢以為縣屬東郡晉屬平原郡高齊改



隸濟州隋開皇三年改屬冀州十六年置博州縣  
改屬焉 黃河南去縣四十三里 郭水水經注  
云郭水出聊城縣東北水泛則津注水耗則輟流  
微子城紂之庶兄封邑于此故有城存 重邱  
在縣東南卽左傳云諸侯同盟于重邱杜注云重  
邱齊地蓋謂此也 荏平故城漢爲縣廢城在今  
縣東五十三里在荏山之平地因山著名石勒之  
賤也賣在荏平人師歡家爲奴 博固城隋圖經  
云或謂之布鼓城卽石勒時築在大河之曲 四  
口故關在縣東八十里一名四瀆口酈道元注水

經云河水又東北流爲四瀆津蓋其處隋初于此  
置四口關 郭城隋圖經云郭城卽亾國郭氏之  
墟 聶政豕烈士刺韓相者 華歆豕仕魏爲司  
空郡人也 廢武水縣在州西南六十里舊八鄉  
後一鄉本漢陽平縣地屬東郡隋開皇八年改陽  
平縣爲清邑縣十六年分清邑縣置武水縣取邑  
界水以爲名屬莘州卽今博州武水縣理是也在  
武水之南隋大業二年廢莘州改屬魏州唐貞觀  
元年改隸博州周廣順二年河決衝沒顯德二年  
割屬聊城縣 黃河在武水縣南二十里 石柱



後魏孝文帝所立爲鄴東之表水經注云武水東流從石柱北是也

堂邑縣

東六十里舊十五鄉今二鄉

本漢清縣發干二縣地屬東

郡隋開皇六年于此置堂邑縣屬毛州因縣西北有漢堂邑故城爲名大業三年改屬魏州唐武德四年又屬毛州貞觀元年廢毛州改屬博州晉改爲清河縣後復舊發干故城漢爲縣廢城在今縣西南王莽河北去縣十里樂平故城本漢清縣也在縣東南三十里後趙錄曰東海王使征東將軍苟晞擊汲桑石勒與晞相持戰于平原陽

平閒爲晞所敗桑犇馬牧勒犇樂平堂邑故城

在縣西北二十七里高帝五年陳嬰爲堂邑侯嬰孫午繼封尚館陶公主

高唐縣

東一百十里舊十五鄉今二鄉

本齊邑春秋夙沙衛奔高唐

以叛史記齊威王曰吾臣有盼子者使守高唐趙人不敢東漁于河至漢以爲縣屬平原郡後魏屬濟州高齊又屬平原郡隋開皇十六年改隸博州唐長壽二年改爲崇武縣神龍元年復舊名梁開平二年改爲重邱縣後唐同光初復舊晉改爲齊城縣漢復舊黃河在縣東四十五里大河故



瀆在縣東一十七里 鳴犢河今名鳴犢溝漢書地理志河水自靈縣別出為鳴犢河溝洫志元帝永光五年河決清河靈鳴犢口而屯氏河絕也故靈城漢為縣在今縣西二十里高齊天保七年省按今博平縣曾為河所壞權寄理此城大河故瀆在其南 爵堤十三州志高唐縣有爵堤以捍河水

博平縣

東北七十五里舊九鄉今二鄉

本齊之博陵邑也史記曰齊

威王伐晉至博陵徐廣注云東郡之博平也漢以為縣屬東郡晉屬平原國隋開皇三年改隸毛州

十六年改屬博州 王莽河在縣北十八里 故

攝城在縣西南二十里

校勘

魏州

館陶縣 總序

周大象二年置毛州以近河為稱隋大業二年廢毛州

按顏師古注云屯音大門反而隋氏誤以為毛氏河乃置毛州故今記大名縣館陶縣屯氏河皆云俗名毛河又曰置毛州以



近河爲稱本此

太平寰宇記卷之五十四終

太平寰宇記卷之五十五

河北道四

相州

相州

鄴郡今理安陽縣

禹貢冀州之域尚書云殷王河亶甲

居相卽其地春秋時屬晉左傳曰齊侯伐晉取朝歌入孟門登太行趙勝帥東陽之師以追之卽此也又爲晉東陽之地郡城卽齊桓公所築戰國時屬魏故史記曰魏文侯出征以西門豹守鄴卽爲魏都也後屬趙秦併天下爲上黨邯鄲二郡之地漢高祖置魏郡理鄴後漢末冀州之理韓馥爲冀



州牧居鄴其後袁紹曹操因之建安十七年册命  
操爲魏公居鄴黃初二年以廣平陽平魏三郡爲  
三魏長安譙許鄴洛陽爲五都石季龍自襄國徙  
都之仍改太守爲魏尹慕容雋平冉閔又自薊徙  
都之仍置司隸校尉苻堅平鄴以王猛爲冀州牧  
鎮鄴後魏于此立相州初道武幸鄴訪立州名尙  
書崔光對曰昔河亶甲居相聖皇天命所相宜曰  
相州道武從之按後魏孝文帝太和十八年卜遷  
都經鄴都登銅雀臺御史崔光對曰鄴城平原干  
里運漕四通有西門史起舊跡可以饒富在德不

在險請都之帝曰卿知其一未知其二鄴城非長  
久之地石虎傾于前慕容滅于後國富主奢暴成  
速敗且西有枉人山東有列人縣北有柏人君子  
不飲盜泉水惡其名也遂止東魏孝靜帝遷都于  
此改置魏尹及司州牧北齊武帝又都焉改魏尹  
爲清都尹後周平齊復改爲相州大象二年自故  
鄴城移相州于安陽城卽今理也隋初郡廢而州  
立煬帝初州廢復置魏郡唐武德元年置相州總  
管府相州領安陽鄴林慮零泉相臨漳洹水堯城  
八縣二年割林慮置巖州四年廢總管府仍省零



泉縣五年廢巖州以林慮來屬仍省相縣六年割  
衛州之蕩源來屬其年置都督府管慈洺黎衛邢  
六州九年廢都督府貞觀元年改蕩源爲湯陰以  
廢慈州之滏陽成安二縣來屬十年復置都督府  
管相魏黎衛洛邢貝七州十六年罷都督府十七  
年以廢黎州之內黃臨河來屬天寶元年改爲鄴  
郡乾元元年復爲相州梁貞明元年魏博節度使  
楊師厚平乃割相州建節爲昭德軍尋軍亂以地  
歸于後唐莊宗入魏遂卻爲屬郡依舊隸魏州晉  
天福三年復升爲彰德軍節度皇朝因之

元領縣十一 今六

安陽 鄴縣 湯陰 永定 臨漳 林慮

五縣割出

滏陽入磁州 內黃 成安 洹水已上三縣入魏州 臨

河入澶州

州境

東西二百一十五里 南北九十里

四至八到

東南至東京三百五十里

西南至西京五百八十里



西南至長安一千四百四十里

東至魏州一百八十里

南至衛州一百十二里

西至潞州三百五十里

北至磁州五十里

東南至澶州一百四十五里

西南至衛州一百五十六里

東北至洺州二百一十五里

西北至遼州三百五十里

戶

唐開元戶七萬八千

皇朝戶主一萬一千七百八十九客一萬一百二

十六

風俗

自北齊之滅衣冠士人多遷關內惟伎巧商販及樂戶以實郡郭由是人情險詖至今好為訴訟

姓氏

內黃郡三姓 扈 路 駱

人物

牛牢 立志不與光武交 杜喬 審配 魏郡人少忠烈有不可犯之節



申紹

字景祚魏郡人為當時冠冕

唐傅奕

鄴人

文麻數為太史令武

杜正倫

洹水人隋時與兄

德初上疏請去佛

第相高宗

至中書令

俱以秀才擢

土產

胡粉

貢

鳳翮席

貢

花口胡盧

紗

貢

絹

安陽縣

舊二十七鄉今三鄉

地即紂之都戰國策紂將甲百萬

左飲于淇谷右飲于洹水淇水竭而洹水不流按

邑地在淇洹二水之間本殷墟口口口即此地七

國時為魏寧新中邑史記曰秦昭襄王拔魏寧新

中更名安陽漢初廢以其地屬蕩陰晉于今理西

南置安陽縣屬魏郡後魏併入蕩陰隋開皇十年

重置安陽縣屬相州 韓陵山在縣東北十七里

劉公幹詩云朝發白馬暮宿韓陵東魏丞相高歡

破尔朱兆兄弟于此山下仍立碑即温子昇之詞

陳尚書徐陵嘗北使鄴讀韓陵碑愛其才麗手自

錄之歸陳士人問陵北朝人物何如曰唯韓陵片

石耳 銅雀臺魏武帝所造遺令令施總帳朝晡

宮人歌吹望吾西陵謝玄暉詩云總帳飄并幹樽

酒若平生鬱鬱西陵樹詎聞歌吹聲云云 魏徵

宅徵鉅鹿人有宅存後為唐睿宗潛龍之第景龍



四年六月二十四日龍飛于此宅 南臺後魏書  
云東魏遷鄴高丞相以南臺爲定國寺作罇浮圖  
極高其銘卽溫子昇文 鄴宮十六國春秋云石  
勒大破鄴宮焚之火旬有五方滅石虎建武元  
年自襄國徙都之至鄴道里相去二百里每一舍  
輒立一宮宮有一夫人侍婢數十季龍所起內外  
臺觀行宮凡四十四所 曹洪宅隋圖經云曹洪  
宅南有景穆寺西有石竇橋 西河按隋圖經云  
卜商子夏田子方段干木所遊之地以魏趙多儒  
學齊魯及鄒皆謂此爲西河非龍門之西河也

愁思岡隋文帝改爲崇義岡 洹水水經注云西  
南自林慮縣界流入東經殷墟北 魏郡城卽漢  
以來爲郡之所故城在今縣東北 鯀堤堯臣禹  
之父所築以捍孟門今謂三刃城是也 涼馬臺  
鄴城記云安陽涼馬臺卽石季龍造以涼馬名之  
高亭搜神記云相州安陽縣南有亭宿者輒死  
後有書生宿夜半有人着皂衣來呼亭主此有宿  
客耶曰然暗嗟而去又有一人衣赤衣來問如前  
移時無復來生乃呼亭主問之向黑衣者誰曰北  
舍猪母赤幘者誰曰西舍老雄雞汝是誰曰我老



蝎也明旦掘之得蝎大如琵琶毒長四尺并及猪  
雞亭遂安靜

鄴縣

北四十里舊十  
五鄉今四鄉

本魏國之鄴邑漢爲縣屬魏郡

後漢桓靈之間冀州刺史嘗寄理于此晉書云建  
興二年避懷帝諱改鄴爲臨漳縣又曰石勒諸將  
佐議欲都于鄴將攻三臺張賓進曰三臺險固攻  
守未可卒下于是進據襄國歷東魏北齊皆都于  
此後周置相州後徙相州于安陽此復爲鄴縣  
故鄴城在縣東五十步本春秋時齊桓公所築也  
自漢至高齊魏郡並理鄴縣今按魏武帝受封于

此至文帝受禪呼爲北都

黃薏谷九州要記云

谷中有豕俗謂佛母豕今牛馬不敢近 濁漳水

在縣東北有永樂浦浦西五里俗謂紫陌河此卽

俗巫爲河伯娶婦處 黃衣水隋圖經云黃衣水

經野馬岡東南注萬金渠入鷓鴣陂卽此水 紫

陌橋地理志云漳水出上黨鄴中趙武帝于漳水

造浮橋接紫陌故號曰紫陌橋橋之下有天井堰

二十里內作十二澄澄相去三百步令相灌注卽

魏都賦云澄流十二同源異口 西門橋按鄴城

故事云西門豹爲令造十二渠決漳水以溉民田



因是戶口豐饒今渠一名安澤陂齊天保五年僕射魏收爲碑存焉 西門豹祠隋圖經云豹祠在縣東南七里北臨太平渠 佛圖澄冢澄死葬于此經冉閔開視了無骸骨又鄴中記云澄死後有人于隴上見之石虎令開視唯有一石虎曰石者朕也葬我而去吾其死矣果然 鳳陽門卽鄴城門也按記云魏太祖都之城內諸街有赤闕南面西頭曰鳳陽門上有鳳二枚其一飛入漳水其一仍以鎖絆其足鄴人舊歌曰鳳陽門南天一半上有金鳳相飛喚欲去不去著鎖絆 梁期城漢梁

期縣故城尙存 玄武苑又有新河水所經亦魏武帝新築有釣臺曲池在焉 長明溝水經注云魏武引漳水入銅雀臺下伏流入城謂之長明溝 三臺銅雀中臺也金虎冰井南臺北臺也石虎于上藏冰三伏之月以賜大臣鄴中記魏武于銅雀西立三臺魏都賦云三臺列峙而崢嶸 石虎故城虎于冬月施流蘇斗帳用大小明光博山文錦係以房子綿施屈膝屏風燒百和名香又于魏武故臺立大武殿窗戶宛轉畫作雲氣擬秦之阿房魯之靈光流蘇染鳥羽爲之以五色線編蒲心



薦席又選揀宮人皆才藝者爲女尙書八座侍中  
納言皆貂璫直侍又作戲馬書令人立于馬上屈  
一腳馬上立書而字皆正好又衣伎兒作獼猴形  
走馬或在頭尾卧側縱橫名爲猿騎又作金龍吐  
酒于殿前金罇可容五十斛供正會又金華殿後  
作皇后浴室九龍銜水之象又種雙長生樹根生  
于屋下枝葉交于棟上是先種樹後立屋安玉盤  
容十斛于二樹之間又皇后出從女騎千人爲鹵  
簿腳著五文織成靴手握雌黃婉轉弓又作雲母  
五明金簿黃雉等扇又虎每獵著金線織成合歡

袴 天樂寺石虎因佛圖澄造寺內有文石香爐  
卽澄所執供養者又有鳴鶴飛龍等舟 三陵卽  
魏武帝文帝甄皇后三陵 華林苑石季龍發萬  
人築苑垣周旋數十里天暴雪三尺凍死者數千  
人太史奏非時降雪此變異乃誅尙書朱軌以塞  
災高齊時名遊豫園鄴中記季龍于華林苑植眾  
果人閒名果悉有之季龍作蝦蟆車四搏掘根去  
一尺深一丈合土載車中植之無不生焉 凌雲

城 金花洲 光碧堂 飛雲殿 御宿堂 五

迴路 蘼蕪島 杜若洲 貧人村 已上皆華



林苑中

湯陰縣

南四十里舊一十七鄉今三鄉

古羸里之地在七國時魏之

湯陰地漢以為蕩陰縣屬河內郡因蕩水為名晉

屬魏郡後魏省隋開皇六年復于今縣東十七里

再置湯陰縣十年廢入安陽縣唐武德四年分安

陽置蕩源縣屬衛州六年改屬相州貞觀元年復

為湯陰從漢舊名

蕩水在縣治北源出縣西牟

山去縣三十五里

羸里一名牖城在縣北九里

即紂拘文王之所城北臨羸水夏曰夏臺商曰羸

里周曰囹圄皆圓土也

浣衣里晉侍中嵇紹葬

所按鄴中記惠帝師敗湯陰千官皆走獨紹端冕

帝側以身捍主遂至見害血濺御衣及事寧左右

欲浣之帝曰此嵇侍中血勿去也詔葬縣南因名

此地為浣衣里

羸水源出縣西北山下水經注

云羸水經羸城北故羸里也亦為牖里牖與羸同

防城隋圖經云湯陰縣有防城即紂囚文王于

羸里築此城以防之後因曰防城

長沙溝一名

宜師溝在縣南二十里

永定縣

東四十里舊一十四鄉今三鄉

本漢內黃縣地晉置長樂縣

高齊省入臨漳縣隋開皇十年分臨漳洹水二縣



于此置長樂縣十八年改爲堯城縣因堯所居此  
城爲名唐末改爲永定縣朱梁開平中改爲長平  
後唐同光初復爲永定 洹水在縣北四里 丹  
朱墓在縣東一里堯之子也 蕭音蟻陽聚故城在  
今縣東左氏傳晉荀盈如齊逆女卒于戲陽注云  
內黃縣戲陽城蕭與戲通

臨漳縣

州北六十里舊  
十二鄉今二鄉

本漢鄴縣地東魏孝靜帝分

鄴縣于鄴城中置臨漳縣周武帝平齊建德六年  
自鄴城移臨漳于今所屬魏郡隋開皇三年改隸  
相州 東山在縣西南十五里東魏高澄于此積

土爲山引萬金渠水爲池作遊賞之處周平齊湮  
池毀山 鷓鴣陂在縣東南三十里與洹水縣同  
利 袁紹墓在縣西北十六里 平陽故城竹書  
紀年云梁惠成王敗邯鄲之師于平陽

林慮縣

西一百十里舊  
十三鄉今一鄉

本漢隆慮縣屬河內郡應劭

注云以隆慮山在北後漢避殤帝諱改爲林慮魏  
屬朝歌郡晉屬汲郡後魏太武帝省入鄴縣文帝  
復立又于此置林慮郡高齊郡廢後周平齊復置  
林慮郡隋開皇三年罷郡十六年于此置巖州大  
業二年廢巖州又爲縣唐武德二年復置巖州五



年廢以縣屬相州按縣城東魏天平元年築又漢志云隆慮有鐵官今縣側近山並多鐵鉏可以鼓鑄隆慮山一名林慮蓋隨縣改也在縣西二十里山有三峯南第一峯名仙人樓高五十丈下有黃花谷北巖出瀑布水下注成池黃花谷西北有洞穴去地千仞下有小山孤竦謂之玉女樓其南第二峯名玉女臺高九百丈其山北第三峯名魯般門水經注云倉谷溪東北逕魯般門其門立闕昂藏石壁霞舉其北有偏橋卽林慮之嶠嶺抱犢固也南接太行北連恆岳又有馬鞍山棲霞谷又

按顏修內傳曰橋順字仲產有二子曰璋曰琮師事仙人慮子基于隆慮山栖霞谷教二子清虛之術服飛龍藥一丸千年不饑故魏文帝詩曰西山有雙童不飲亦不食謂此也黃花水在縣西北黃花谷北崖上高十七里去地七里懸水東南注壑直瀉巖下伏若雞翹故謂之雞翹洪蓋天台赤城之流也其水東流至谷口潛入地下十里復出名曰柳渚是黃花谷水重源再發也東流注于洹水其谷號曰黃花谷內有仙母冢顏修內傳云仙母卽仙人王津母也墓前有大樹九株存焉又水



太平寰宇記卷之五十五  
經云黃花谷西北有洞穴謂之聖水窟 洹水出  
縣西北俗謂安陽河卽聲伯夢涉之所源出林慮  
山東平地 王母祠隋圖經云王津母有廟每春  
三月桃花盛發籠冠于廟宇

太平寰宇記卷之五十五終

太平寰宇記卷之五十六

河北道五

衛州

磁州

衛州

衛州

汲郡今  
理汲縣

禹貢冀州之域後爲殷都在今州東北

七十三里衛縣界朝歌故城是今州理卽殷牧野  
之地周武王滅殷分其畿內爲三國邾封紂子武  
庚鄘管叔尹之衛蔡叔尹之以監殷人謂之三監  
武王崩三監及淮夷叛成王旣伐管叔蔡叔以殷  
餘民封康叔爲衛侯今魏郡之黎陽河內之野王



朝歌皆衛之分其後十五葉懿公爲狄所滅齊桓公更封于楚邱今滑州衛南縣是也其河內殷墟更屬于晉後又屬齊戰國時屬魏秦屬河東郡漢爲汲縣地屬河內郡魏黃初中置朝歌郡屬冀州晉武帝改朝歌爲汲郡仍屬冀州後魏孝靜帝移汲郡理枋頭城按枋頭城今在衛縣界又于汲縣置義州以處歸附之人周武帝改義州爲衛州隋大業三年改爲汲郡唐武德元年改爲衛州二年陷竇建德四年賊平仍舊領衛清淇湯陰三縣其年廢義州以汲縣來屬六年以湯陰屬相州貞觀

領縣四

元年州移治于汲縣又廢殷州以共城新鄉博望三縣來屬六年廢博望縣十七年廢清淇縣其年又以廢黎州之黎陽縣來屬天寶元年改爲汲郡乾元元年復爲衛州

汲縣 新鄉 衛縣 共城

州境

東西二百三十六里 南北一百四十四里

四至八到

東南至東京一百三十五里



西至西京三百九十里

口至長安

缺

東至

缺

西至懷州三百五十里

南至

缺

東北至澶州二百五十里

北至

缺

東南至滑州一百三十三里

西北逾山至澤州陵川縣二百四十里

正南渡河至鄭州二百三十里

戶

唐開元戶三萬六百

皇朝戶主八千五百一十四客一千九百六十八

風俗

十三州志云朝歌紂都其俗歌謠男女淫縱猶有紂之餘風存焉

姓氏

黎陽郡四姓 蘧 桑 衛 柘

人物

杜詩

河內汲人為南陽太守方之召信臣號杜母也

向長

字子平朝歌人隱居不仕



讀易至損益卦喟然歎曰吾已知富  
不如貧貴不如賤未知死何如生耳  
孫登共  
張彌字巨泰城武德城石勒攻得之彌曰  
當活健兒何以殺也勒拔為牙門將

土產

絲布絹

汲縣

舊一十六鄉今三鄉

本紂之都近郊十三里乃武王戰于

牧野即其地漢為縣屬河內郡魏立郡于此後魏  
于此置義州及伍城郡伍城縣周改義州為衛州  
廢伍城郡其伍城縣屬衛州隋開皇六年改伍城  
縣為汲縣大業三年改屬汲郡唐武德元年重置  
義州汲縣屬焉四年廢義州縣屬衛州貞觀元年

衛州自衛縣徙治所于汲縣

蒼山在縣北十五

里酈道元注水經云山西蒼谷有蒼玉珉石故為

名焉

博望岡在縣東北五十里接內黃西界上

有石墳云是張騫冢非也有二石柱俗云故原武

典農高府君之神道呼為石柱國

鐵邱春秋衛

太子登鐵邱是也

清水在縣北三里入于河

黃河西自新鄉縣界流入經縣南去縣七里謂之

棘津亦謂之石濟津故南津也春秋僖公二十八

年晉伐曹曹在衛東假道于衛衛人不許還自南

河濟宋元嘉中遣宣威將軍垣護之以水軍守石



濟卽此也 老子祠後魏書云鎮西將軍廉侯事  
道于汲縣置立堂宇鑄石爲老子像而祠祀之  
太公廟在縣西南二十五里水經注云汲城東門  
北側有太公廟廟前碑云太公望者河內汲人又  
有太公泉 鳳臺因鳳所集爲名 襄王陵魏襄  
王之陵也漢初有人于冢中盜金得竹簡書十餘  
萬言今號爲汲縣冢書是此陵所得 比干墓在  
縣北十餘里有石銘題云殷大夫比干之墓魏太  
和中孝文帝南巡親幸其墓弔焉刊石于墓 鄘  
城三監之鄘城在今縣東北十三里 霖落泉在

### 縣界

新鄉縣

西四十八里舊  
十九鄉今四鄉

本漢汲縣獲嘉二縣之地漢

書武帝將幸緱氏至汲縣之新中鄉卽此處也隋  
開皇六年于兩縣地古新樂城中置新鄉縣屬衛  
州取新中鄉以爲名新樂城本十六國時燕樂安  
王臧所築唐武德四年屬殷州貞觀元年廢殷州  
縣屬衛州 清水去縣北十里西自懷州獲嘉縣  
界流入與淇水合東入白溝酈道元水經注云黑  
山在縣北白鹿山東清水所出 大河西從絳郡  
界入懷州東又入當縣界南入洛陽卽龍門也



大清淇西自魏郡朝歌縣界入分爲二派一在郡東  
一在郡西俱南流入河酈道元水經注云淇水南  
與清水合而入白溝右會宿胥皆故瀆之名古  
汲城在縣東北四十八里酈城在縣西南三十  
二里卽酈國也故獲嘉城冀州圖云漢武元鼎  
六年上幸汲郡新中鄉至此聞得呂嘉首因以獲  
嘉名縣卽此處在今縣西南十里古城存高齊天  
保七年移獲嘉于今其城西此城遂廢臨清關  
在縣東北四十八里自河內入汲郡大驛路延  
津關在縣東南三十五里東南過河入滑州大路

延津城左傳鄭伯弟叔段侵鄭至于廩延杜預  
注云汲郡城南有延津魏志太祖使于禁將守延  
津以拒袁紹卽此城也萬戈城在縣界

衛縣

東北六十八里舊  
十九鄉今四鄉

本古朝歌地卽紂之都也有

故城在今縣西二十二里史記謂之殷墟淮南子  
云墨子不入朝歌是也漢爲朝歌縣屬河內郡魏  
黃初中朝歌縣又屬朝歌郡晉武帝改爲汲郡隋  
開皇三年罷郡縣屬衛州大業二年改朝歌縣爲  
衛縣仍置汲郡于縣治延津在縣西二十六里  
魏志曹操遣于禁渡河守延津卽此地也黑山



一云墨山在縣西北五十里九州要記云墨子昔居此山採茯苓餌五百歲或老或少又魏志漢靈帝中平二年黑山賊于毒白繞眭固等十萬餘眾以掠魏郡號黑山賊 方山水經注云方山在衛縣西以山四方故曰方山 蘇門山在縣西八十一里蘇門山一曰蘇嶺俗名五巖山魏氏春秋云阮籍見孫登長嘯有鳳凰集登所隱之處故號登爲蘇門先生 朝陽山在縣西南四十里 同山在縣東一十九里 倉山在縣西五十里西與倉泉水相接 錫盆水一名盆水一名錫水源出縣

西北四十里石坎下灣屈似盆其味如醴故名錫盆其水流可百餘步北岸有盤石架空南枕盆水歷盤石之下東流其盤北連高阜雖亢陽石常潤激每時雨開霽輕津散垂滴盆水泠泠可聽經旬方絕俗呼此石爲漏天桶自此東流五十餘步有飛泉出于南岸懸注盆水又謂小瀑布俗謂之北流泉焉 卷水水經注云卷水出衛郡朝歌 白溝冀州圖云白溝起在衛縣南出大河北入魏郡淇口水出其山東至今縣西里許過又南流二十三里與清水合入河謂之淇水口又北征道里



記枋頭城故虞國之險淇水經其後清水經其前是枋頭城冀州圖云枋頭城在縣南去河八里對酸棗棘津是也卽漢建安中曹操于淇水口下大枋木以成堰遏淇水東入白溝以通漕運故時人號其處爲枋頭晉太和四年大將軍桓溫北伐慕容暉時天旱水道不通乃鑿鉅野三百餘里以通舟運自清水入河暉將慕容垂率眾八萬來拒溫大破之遂至枋頭會軍糧竭盡焚舟步退垂以八千騎追之溫戰敗于襄邑亦謂此也後苻氏克鄴改枋頭爲永昌縣十六國春秋云晉劉牢之救

苻丕慕容垂帥師至枋頭以拒之知晉軍盛乃退後魏嘗移汲郡理此鹿臺在縣西二十里帝王世紀云紂造飾以美玉七年乃成大三里高千仞餘址宛然在城內卽紂自投火處紀年曰武王擒紂于南單之臺蓋鹿臺之異名耳苑城在縣北四十里有沙邱臺俗稱妲己臺又東二里南臨淇水有上宮臺詩云要我乎上宮卽此也頓邱縣在今縣西北二里卽古頓邱今置通靈觀永昌故城隋初置永昌縣大業中廢故城在今縣之西朝歌故城在今縣西二十二里紂之所都漢以



爲縣後魏移朝歌于今衛縣東之一里此城因廢  
糟邱酒池冀州圖云在朝歌南一里土人依約  
識之 陽河水在縣西北平地卽紂斲朝涉之脛  
處也

其城縣

東北六十二里舊十二鄉

本共伯國也故城在縣東一里

十步尙存魯連子云共伯名和好行仁義諸侯賢  
之周厲王無道國人作難流王于彘諸侯請奉和  
以行天子事至十四年厲王崩于彘共伯使諸侯  
奉王子靖爲宣王而共伯復歸于國漢以爲縣屬  
河內郡晉屬汲郡後魏屬林慮郡高齊天保七年

省共縣仍移就獲嘉縣古城以處之復爲獲嘉縣  
焉隋開皇四年移獲嘉縣于修武故城于此又置  
共城縣因此添城字以屬衛州 白鹿山在縣西  
北五十三里西與太行連接上有天門谷百家巖  
盧思道西征記云孤巖秀出上有石自然爲鹿形  
遠視皎然獨立厥狀明淨有類人工故此山以白  
鹿爲稱又水經注云長泉水源出白鹿山 共山  
在縣北十里闕駟十三州記云昔共伯復歸于國  
逍遙得意于共山之首 尖山向長字子平得仙  
之處長嘗讀易至損益卦曰吾已知貴不如賤富



不如貧但未知死何如生耳 老子山在縣東南  
二十里 天門山在縣西五十里酈道元水經注  
云天門山石自空狀若門焉又九州要記云天門  
山有三水稻康採藥逢孫登彈一絃琴卽此山  
百門陂在縣西北五里方五百步許百姓引之以  
溉稻田出米明白香潔異于他稻魏齊以來嘗以  
薦饗陂南通漳水 五穴水水經注云苑水上承  
淇水東流歷五軍東北得舊石涇故五水分流世  
號五穴口 故凡城古周公子凡伯國也左傳曰  
凡蔣邢茅胙祭周公之肩在今縣西南二十二里

羅門按郡國縣道記云其城縣理西北六十里  
大山之中有羅門卽山峽陁東之所也內有南羅  
中羅北羅三城各相去六七里其山南北約二十  
里東西約十五里四面皆高山可爲栖遁之地也  
隕城蘇忿生十二邑此其一也 王莽城後漢  
王莽築之在今縣西北八十五里凡有三城如鼎  
足今尙存焉 沮洳山在縣西淇水出于此山  
共叔段墓 九龍泉並在邑界

### 磁州

磁州滏陽郡今滏陽縣本漢魏郡武安縣地周武帝於此別



置淦陽縣及成安郡隋開皇十年廢郡于縣置磁州以昭義縣界有磁山出磁石因取爲名大業二年廢州以縣屬相州唐武德元年復置磁州領淦陽臨水成安三縣四年割洛州之臨洛武安邯鄲肥鄉來屬六年置磁州總管府領磁邢洛黎相衛六州其年廢總管府以臨洛武安肥鄉三縣屬洛州磁州領淦陽成安邯鄲三縣貞觀元年廢磁州以淦陽成安屬相州以邯鄲入洛州永泰元年六月昭義節度使薛嵩請于淦陽復置磁州領淦陽武安昭義邯鄲四縣天祐三年勅以與西慈州同

名改爲惠州天祐十三年卻復爲舊磁字

元領縣四

淦陽 武安 邯鄲 昭義

州境

東西一百七十里 南北一百二十五里

四至八到

南至東京四百里

西南至西京七百里

西南至長安一千五百里

東至魏府一百八十里



西至潞州三百八十里

南至相州六十里

北至洛州一百一十里

東南至相州鄴縣七十五里一作二十五里

西南至相州鄴縣界七十五里

西北至遼州四百三十三里

東北至洛州一百一十里

戶舊無戶籍

皇朝戶主一萬三千八百三十二

風俗同洛州

土產

磁石 磁毛

滏陽縣舊六鄉今五鄉本漢武安縣地屬魏郡魏黃初三年

分武安立臨水縣屬廣平郡以城臨滏水故曰臨

水又以城在滏水之陽亦曰滏陽周武帝于此別

置滏陽縣屬成安郡隋開皇三年廢郡縣屬相州

十年于此置磁州滏陽屬焉大業二年廢磁州縣

屬相州唐武德元年重立磁州縣又屬焉 鼓山

亦名滏山宋永初古今山川記云鼓山有石鼓形

二所南北相當俗語云南鼓北鼓相去十五冀州



圖云鄴城西有石鼓鼓自鳴卽有兵魏都賦云神  
鉦迢遰于高巒是也高齊末此鼓鳴未幾云鄴城  
有兵而齊滅隋文季年又鳴聞數百里也隋圖經  
云湓口山出磁石本草云磁石鐵之雄今有石鼓  
山出者又魏地記云湓口山卽魏帝邀擊袁尙于  
此八陁第四曰湓口陁山嶺高深實爲險阨 漳  
水自林慮縣流入有石漳渠焉 湓水源出縣西  
北鼓山南巖下泉源奮湧若金之揚湯故以湓口  
名之其水冬溫夏冷山海經云湓水出神菌之山  
也 九侯城亦名鬼侯城在縣西南五十里蓋紂

時鬼侯爲紂所殺也禮記曰脯鬼侯謂此也按隋  
圖經云臨水縣九侯城也司馬彪注云鄴西有九  
侯城蓋鬼侯國是九一作鬼 東魏二陵卽大司  
馬季靜帝父亶并靜帝二陵也隋圖經云在縣東  
卽武安西北大岡高齊天保末誅諸元子孫欲平  
元氏二陵壓殺數十人遂止 高齊神武陵在東  
魏二陵之側去縣三里今有天鹿石關尙存 岐  
安冢隋圖經云岐安冢在魏武陵東三里安死後  
每鬼語其子逸云吾冢近武帝陵見攻伐爲吾辭  
謝逸等卽以碑碣勒石謝乃止 石季龍墓在縣



西南十四里 佛圖澄墓在縣西南十七里 廢  
安州城在縣東北六里周建武六年置州隋開皇  
三年廢

武安縣

西北九十五里元二鄉

本漢縣地七國時趙地趙將李

牧封武安君即今縣也漢屬魏郡魏屬廣平郡隋  
開皇三年屬相州十年割屬磁州大業二年廢磁  
州屬洺州唐隸磁州 武安故城在縣西南五里  
六國時趙邑也史記趙奢之救闕與秦軍鼓譟武  
安屋瓦皆震即此也 錫山山海經云錫山其上  
多玉牛首之水出焉 三門山在縣西北八十里

山有三足峻峙如門 百尖山在縣西四十里

四見山在縣西二十里 赭山在縣東南十八里

出赭土 紫山在縣東三十里唐天寶六年改爲

朱衣山山下有水北流中有鮒魚名朱衣鮒鱗色

若金腸似朱 洺水本名漳水源出縣西北三門

山山下去縣八十三里水經云洺水出易陽縣西

山按隋圖經云晉惠帝敗于湯陰之歲烏桓鮮卑

掠鄴城婦女悉沈于洺水即此河也 白鴻水在

縣西北八十五里

邯鄲縣

東北七十里元三鄉

本衛地後屬晉七國時爲趙都趙



敬侯章自晉陽始都邯鄲至幽王遷降秦遂滅趙  
以爲邯鄲郡邯山名單盡也邯山至此而盡城郭  
從邑故單字加邑魏以爲縣屬廣平郡隋開皇十  
年置磁州邯鄲屬焉大業二年廢磁州縣入洺州  
唐重置磁州縣還來屬 邯山在縣東南五里  
靈山隋圖經云趙武靈王登靈山因以石鑿人馬  
之形其下有井以石覆之俗呼靈井 牛首水在  
縣西北三十里又名曲河源出縣西南平地漢書  
地理志云堵山牛首水所出 溫明殿漢趙王如  
意所造其處卽世祖晝臥此殿耿弇入造牀下勸

帝卽位于此 叢臺在縣內東北隅冢墓記云在  
小城內 洪陂臺在縣西三里亦漢縣名也韓詩  
外傳云周舍死後簡子與諸大夫飲于洪陂臺酒  
酣泣曰吾聞千羊之皮不如一狐之腋眾人之唯  
唯不如周舍之諤諤阮籍詩云朝登洪陂臺日夕  
望西山 石子岡隋圖經云歷陵城西十里有石  
子岡實山也而高大有冢如硯子世謂之研子冢  
是趙簡子冢石虎令人發之初得炭深一丈得連  
木板厚一丈高八尺次得泉水水清冷非常合牛  
皮爲囊作絞車以汲之一月而水無極乃止築城



遶之氣成樓閣 廚宰城隋圖經曰叢臺在內

干將城在縣東二十二里洺州記云城南門外有

干將劍鑪及淬劍池 趙簡子臺在縣西十二里

公孫杵臼程嬰墓在縣西十五里 趙奢墓在

縣西北七里 樂毅墓在縣西南十八里 藺相

如墓在縣西南二十五里

昭義縣 西三十五里元二鄉 魏黃初三年于今滏陽縣置臨水

縣北齊天保元年移理松谷口口口周武建德六

年移理故涉城即今涉縣是也隋開皇七年移于

西戍十年移于今理唐武德六年廢永泰元年再

置仍改名昭義 滏口泉在縣西一里半出鼓山

南脚流至 漳河在縣西南四十里從潞州涉縣

界至

校勘

衛州 總序

其年廢義州

按新唐書地理志武德元年以汲新鄉置

義州四年州廢以汲來屬今記不書置義

州但書其廢故與上文周武帝改義州為

衛州之文似相牴牾



又廢殷州

按新唐書地理志于獲嘉縣置殷州在武德四年今記不書

新鄉縣

延津城杜預注云汲郡城南有延津

按杜注本文云陳畱酸棗縣北有延津今乃云汲郡城南以意更之耳酸棗在河南故北有延津汲在河北故南有延津今記新鄉縣酸棗皆載延津以隔河兩言之也

太平寰宇記卷之五十六終



卷之二